

Naalakkersuisut siulittaasuata ukiortaaq 2007-imi oqalugiaataa



*(Malugiuk: Oqalugiaat oqalugiaatigineqareernerani
aatsaat tusagassiorfinit saqqummiunneqarsinnaavoq)*

Asasakka nunatsinni najugallit tamassi.

Naalakkersuisut sinnerlugit ajunnginnerpaanik tamanik peqqinnermillu kissaallusi ukiortaami pilluaritsi, qujanarlu ukiumi qaangiuttumi ineriartortitseqataarusussuseqarnermik pigisaqarlusi inuiaqatigiit siumukartuarnissaat anguniarlugu suleqataalluarsimanissinnut.

Ukiut Kalaallit Nunatta oqaluttuarisaanerani immikkooruteqartut aalajangiisuulluinnartussallu aallarnerpagut. Naak Namminersornerulernitsinniit sorpassuartigut ajunngitsumik ineriartortitsisimagaluarluta, taamaattoq piumasaaqatinut nutaanut angummakkumalluta ingerlariaqqittariaqalerpugut.

Eqqarsariartaatsivut illinernullusooq ikkutiinnaqqalersut qimallugit sorpassuartigut nutaamik eqqarsarluta periuseqartariaqalerpugut. Sapiussuseqartariaqarpugut immitsinnullu tatigaluta upperalutalu ingerlavissarput siunersiortariaqarparput.

Suna nutaaq aallarnerangatsigu nalornisinniarneqalersarpugut, kisianni ajunngitsussamik neriutugisaqarnerup aqut ingerlavissarput qaammartittarpaa.

Ukiaq manna Inatsisartuni partiit tamakkerlutik kommunit kattussuunneqarnissaat akuersissutigaat. Tamanna inuiaqatigiit ingerlatitaanerisa aaqqissugaanerani annertuumik allannguinermik kinguneqartitsissaaq.

Peqatigitillugu suliat Namminersornerullutik Oqartussanit ullumikkut akisussaaffigineqartut 1 milliard koruunit angullugit aningaasartaqartut 2009-miit 2013 ilanngullugu kommuninut nuunneqartussaapput.

Suliassaq tullinnguuttoq tassaavoq Namminersornerullutik Oqartussat kommunillu suleqatigiilluinnarlutik suliassat sorliit nuunneqarnissaannik aalajangersaanissaat. Tassani kommunit namminneerlutik uummaarissumik peqataanissaat naatsorsuutigilluinnarpara.

Maannakkut aaqqissusseqqinnissami innuttaasugut nunatsinni sumiikkaluaruttaluunniit pisunut ulluinnarni inuunitsinnut attuumassuteqarluinnartunut annertunerusujussuarmik aalajangeeqataasinnaanissamut periarfissinneqarpugut. Periarfissiissut tamanna susassareqatigiinnermik akisussaaqataanermillu misigisimanerup annertusarnissaanik aqutissiuissaaq, atorluagassaavorlu.

Pingaarteqartorujussuaq alla ukioq manna pisussaq tassaavoq kalaallit qallunaallu Namminersorneq pillugu Isumaliutissiisutaata naammassineqarluni ukiamut saqqummiunneqarnissaa.

Isumaliutissiissutip tunniunneqarnissaa qilanaarluta pissangallutalu utaqqivarput.

Nalunngilarput apeqqutini pingaarutilinni Qallunaat Nunaallu aporaaffusinnaasunik aaqqinniagaqartussaalluta. Nunamut piginnittusaaanermut tunngatillugu apeqqut, aatsitassanit ikummatissaniillu isertitanit agguaasseriaatsimut tunngatillugu apeqqut kiisalu nunanut allanut tunngatillugu oqartusaaanermut apeqqutinut attuumassuteqartut qularnangitsumik aaqqiagiingissutaasinnaapput.

Tamakku Nunatta Qallunaat Nunaatalu akornanni qanoq iliorluni aaqqiussuteqarfigisinnaanerit paasiniaarlugu eqqartuinissat kingornagullu Naalackersuisunut innersuussuteqarnissat suliassaapput tullinnguuttut. Tungaannullu assagut sarliaannarlugit utaqqissanngilagut.

Naagga, akisussaaffinnik annertunerusunik tigusiartuaarnissamut piareersartariaqarpugut.

Ulloq nunatsinnik piginnittuunitsinnik suaarutiginniffigisarput namminiiliviffigissavarput – tamanna qularutissaanngilaq. Tamatumalu tungaanut ingerlanitsinni Namminersornerulernitsinniit Namminersorneq aqqusaaqqaartariaqarparput - Namminiilivinnissamut piareersarfiususaaq.

Ineriartornermi tamatumani Danmark FN-imi aalajangersakkat malillugit atsiogataaffiginikuusaminik pisussaaffeqarpoq aqqutissiueqataassalluni.

FN-ip aalajangersagaa nr. 1803, 1962-imeersoq ilaatigut ima oqaaseqatigiinnik ilaqartinneqarpoq: *"Inuiaat qaquguluunnit napasinnaanissaminut periarfissaminik arsaarneqassanngillat."*

Tassa nammineernerulernissarput anguniarlugu aningaasarsiornitsigut periarfissanik ujaruunitsinni Danmark aqqutissiueqataasariaqarpoq. Aningaasarsiornikkut periarfissat pitsaanerulersissagutsigit nunanik allanik suleqateqarnerput annertusartariaqarparput. Suleqatinik attaveqarneq nammineerluta ingerlassinnaavarput – apereqqaartuataassaguttami nammineersinnaassuserput ineriartornaviannngilaq.

Ukiuni makkunani aatsitassanik uuliaqarsinnaaneraniillu nunatsinni misissuinerit annertuseriarujussuarnikuupput. Misissuimallutik akuersissutinik qinnuteqartartut aatsaat taamak amerlatigilerput. Maannakkorpiaq misissuinissanut akuersissutinik tunineqarnikuusut 60-it missaanniipput.

Maanna uuliaqarsinnaanerani misissuinerit nutaat aallartinneqalerput, naatsorsuutigisinnaavarpullu misissuinerit aningaasartuutaasartut suli qaffariaateqarnissaat.

Taama soqutiginninnerup takutippaa nunatta pisuussutinik uumaatsunik nalituunik pigisaqarneranik aatsitassarsiorfiliuteqatigiiffiit uuliasiorfiliuteqatigiiffiillu upperinninnerannik.

Peqatigisaanik ukiuni aggersuni qanittuni aatsitassarsiorfiit allat nutaat ammarneqarnissaat naatsorsuutigilluinnarparput. Taamaattumik isumaqarpunga pisuussutinit uumaatsunit aningaasarsiuteqarnerput eqqarsaatigalugu siunissami isumalluarnissamut pissutissaqarluartugut.

Pisuussutinit uumaatsunit malunnaatilimmik aningaasarsiuteqalersinnaanissarput namminiivilinnissamut ammaassisussatut matuersaataarataannaavoq, tamatumalu tungaanut eqqarsarluarnissaq pisariaqarpoq, isumatusaartumimmi periuseqarnissaq pingaaruteqartorujussuuvoq.

Danmark kivitseqataasariaqarpoq naatsorsuutigarpullu Naalagaaffeqatigiinnermi naligiinneq, akaareqatigiinneq ataqpeqatigiinnerlu eqqarsaatigalugit Savalimmiormiut pisuussutinut uumaatsunut tunngatillugu aaqiissuteqarsimanerannit ajornerunngitsumik angusaqarnissarput.

Namminersulernissatta piareersarnissaa suliassaavoq annertoq.

Naalagaaffeqatigiinnerup ataani inatsisit naleqqussagassat arlalippassuussapput. Suliassarpassuit tamakku inaarsarneqarnissaat malitseqartinniarlugu immikkut ittumik suliqartitassanik inuttaliilerpugut, piaartumik sulillutik aallartittussanik.

Taakkua qulaajaanernik ingerlatsissapput, taamaalilluni isumaliutissiissut naammasseriarpap kalaallit qallunaallu naalakkersuisuisa isumaqatiginninniarnissaannut tunngavissat piareersagaareerniassammata.

Innuttaasullu suliap ingerlanneqarnerani malinnaatinneqassapput. Namminersorneq pillugu inatsisissap taasitutigineqannginnerani imarisaa pillugu innuttaasut paasititsiniaavigineqareersimassapput.

Nunatta aningaasaqarnera siumut isigisumik patajaallisartuartaqarparput.

Aningaasarsiornikkut ukiuni kingulliunerusuni siuariartornerput siora aamma attatiinnarparput. Suliffissaaleqisut ikileriaateqarput, akileraarutitigut isertitat qaffariaateqarput nunattalu karsiani 2 milliard koruunit missaanni uninngasuuteqarluta.

Taamaattumik aningaasanut inatsimmi siunissaq ungasinnerusooq eqqarsaatigalugu - uninngasuutivut atorluarlugit utertinneqartussanngorlugillu - aningaasaliissuteqarpugut.

Aningaasanut inatsimmi ukiunullu missingersuussiorfiusuni amigartooruteqartarnissamik pilersaaruteqaraluartugut, siunissaq qularnaarniarlugu iliuuseqarpugut. Aningaasaliissutaasut siunissami uteralerumaarput, tulluusimaarutigaaralu aningaasanik atorniaqqaanngikkaluarluta siunnerfeqarluartunik iliuuseqaratta.

Ilinniarsimassutsip piginnaasaqassutsillu qaffassarnissaanut aningaasarpassuit immikkoortippavut - tamanna siunissamut aningaasaliineruvoq. Eqqaamajuassavarpummi annerusumik qaammaasaqarneq piginnaasaqarnerlu imminut akilersinnaajuarmat.

Inuussutissarsiонерit nukittorsaaviginiarlugit suliffeqarfiit akileraarutigisartagaat appaavigineqarput. Peqatigitillugu inuit najugaqarfinnut suliffissaqarfiunerusunut nuussinnaanissaat periarfissiussutiginiarlugu tapiissuteqarsinnaanermik pilersitsivugut.

Atortulersuuterpassuillu kisiisa isiginiarsimanngilagut, inuummi inuiaqatigiit ingerlatitaanerini kivitseqataasussap peqqissusia isiginianngikkutsigu inorsassaagut.

Timi anersaarlu ataqatigiissuupput qalliinnarlu isumaginiassagutsigu tusiapittumillusoq ingerlalissaagut.

Tamatta inuunitta peqqissumik, imaqarluartumik ajunngitsumillu ingerlannissaanut akisussaaffeqarpugut.

Ukiortaap ullumi aallarnernerani ukiup qaangiuttup ingerlanerani ilagut toqukkut qimagallutik akornatsinniikkunnaarsimasut eqqaanngitsoorumanngilakka.

Taakku ilagisaat – maqaasisaqartullu allat - misiginneqatigalugit qimaguttup inuunermini nuannaarutaasimaneraniq eqqaamasaqarnerup nakussannartuanik pigisaqarlusi qanortoq ajunngitsumik ingerlariaqqikkisi.

Toqu ilaanneeriarluni ilimatitseqqaarani takkussinnaasarpoq.

Nappaammik eqqugaallutik qimaguttut eqqissineranni qutsattarpavut, sulili ilaqarpugut namminneq toqqakkaminnik maani inooqataanermit qimaguttartunik.

Imminortameq inuiattut ajornartorsiutigaarput oqimaalluinnartoq, tamanna miserratisinnaanngilarput. Inuiaavugut inuppassuaqarfiunngitsut tamattalu eqqugaavugut, eqqugaasinnaallutalu.

Akuersaaruminaatsuuvoq oqaannarfiunanili, peqqutimmi assigiinngitsorpassuusinnaammata. Inuunerulli tamarmi ilinniarfiuneraniq eqqaasittuartariaqartarnissarput pisariaqarpoq. Nuannaaginnaq inoorusunnarsinnaasaraluartoq taamaattoq ulloqartarpoq taarsiornarnerusunik. Ullut nikallunganartorsiorfigisat nalliunnerini oqimaatsorsiornerpaaffianilu ullup qaaqqittusaaanera imminullu qiummassarsinnaassuseqarnerup ammut ingerlaaginnarnermit makittarissititsisarnera eqqaamajuartariaqarparput. Inuuneq tunissutaavoq erlinnartoq paarilluagassaasorlu.

Qujanartumillu inuuneq nuannersorpassuaqarpoq. Ukiuni makkunani kaamisarneqarluaatitut misigisarpara inuiaqatigiit akunnitsinni malunnaatilimmik eqeerartornerput. Sorpassuartigut inuttut qaammaasaqassutsitsigut ineriartorpugut. Suut pissusissaanngitsut akiorniarlugit aammaasumik oqallittalernikuuvugut. Meeqqanik kinguaasiuutitigut atonerluisarnerit aammalu sumiginnaasarnerit akuersarneqarsinnaanngillat. Nuannaarutissaalluinnarporlu akunnitsinni ilaqaratta amerlasuunik pisortanit ikiorneqarnissaq utaqquinnarnagu, namminneerlutik iliuseqartunik – qujanaq inuiaqatigiinnik taama kivitseqataarusullusi akisussaaffimmik tigusiassasi.

Sumiginnaasarneq akiorniarlugu qaammarsaanerit kommunikkaarlugit ingerlanneqartut aallartilluareerput, matumani susassaartut tamarmik peqatigineqartarlutik. Qaammarsaanerit ingerlateqqissavagut, isumaqarpungalu soorlu ilaqutariit pitsaanerusumik sullinneqarnissaat eqqarsaatigalugu suliniuterpassuanngortut neriunaateqarluartut isumalluannartullu.

Ilinniartitaanermi tusakkavut kingullit nuannersuupput tulluusimaarnartuullutillu. Ilinniartunik siunnersuisarnerup ukiuni kingullerni nukittorsaavigineqarnerata kingunerisaanik ilinniarnerminnik taamaatitsiinnartartut 15 %-imik ikileriasimapput. Peqatigitillugu ilinniakkamik ingerlassaartut 11 %-imik amerleriasimapput. Tamatumalu saniatigut inuusuttut meeqqat atuarfianniit ingerlariaqqinngitsoorsimasut aallartiteqqillugit Piareersarfinnik taasani atuartinneqartarnerat aallartinneqarnikuuvoq, kiisalu piginnaanngorsaaqqiinerit aamma ingerlaavartunngornikuullutik.

Ineriartorneq tamanna nuannaarutissaavoq sulili piumassuseqarnerulersitsilluni – pingaartumik aamma ukioq manna Ilimmarfiup sananeqarluni naammassineqarnissaa ingalluni isumalluarnerulersitsivoq. Nuannaarnerullu pianik unikaallannissamut periarfissaqanngilagut. Tamatta pitsaasusaaq anguniarlugu suleqataasariaqarpugut. *“Oqaq amigavippog, assaat sulissapput, tassuunalu kalaallit akitsilissapput”*. Taalliortup siumukarnivimmik angusaqarusussuseqartup Aggu Lyngep taalliaa taama ilaqarpoq.

Suliffeqarfiit nunatsinniittut siumukarnissami aamma *suli* annertunerusumik peqataasariaqarput. Namminersorlutik suliffiuteqartuugunik imaluunniit pisortat suliffeqarfiutigippatigit tamatta pisussaaffeqarpugut ilungersoqataassalluta. Siunissamimi sulisoriumaagassat pikkorissuunissaat kikkut tamat soqutigisarisariaqarpaat.

Nunarsuarmioqataanerput sutigut tamatigut malunniukkiartuinnavippoq. Sorlaqarfipput inuunitsinnilu nukittoquterput – kinaassutsimik misigisimanagerput – atorluarlugu avammut nittarsaattariaqarpugut. Unammilleqatigiinnermi sakkortusiartuinnartumi peqataanissatta aqqutissiunnessaa qulakkeertariaqarparput. Tatineqariartuaaginnavissanngikkutta peqataasariaqarpugut, naammaginarsinnaanngilarmi allanit isumagineqarnissarput naatsorsuutigalugu utaqqimaassagutta. Allantik isumalluuteqarneq nammineerusussutsimut nukillaarsaataavoq pinaveersaarneqartariaqarlunilu. Taamaakkaluartorli suleqatiginnikkusussuseqarnermik anersaaqarluta inuiannut allanut ammasumik pissuseqarnissamik pisussaaffeqarpugut - imminuinnarmi aallutilissagaluarutta mattukkiartulissaagut naggataagut asinngariartulernermillusoq kinguneqartitsilersussamik.

Ukiuni makkunani suli annertunerujartortumik avammut ammaakkiartornerput akornatsinni noqasunnerunermik pilersitsisariaqarpoq. Aasaq kingulleq EU-mik suleqateqarnitsinni nutaamik suleqatigiussiornerput periarfissanik aalisarnerinnaanngitsutigut siamasinnerusumilli ammaassivoq. Angusaq Kalaallit Nunaanut kusarnartuuvoq EU-mimmi isumaqatiginninniartarnerit nukinnik atuiffiusaqimmata.

Ukioq manna Amerika avannarlernut toqqaannaq attaveqalissaagut. Tamatuma takornariaqarnermut sunniuteqarluarnissaa naatsorsuutigaa. Nunarsuarput pinnersoq eqqissinartorlu qaqugorsuarmut tulluusimaarutissaraarput.

Ukioq kingulleq nunatsinnut takomariarsimasut amerleriaateqarsimapput, taakkunanngalu amerlasoorpassuit Ilulissat eqqaata nunarsuarmioqatigiit eriagisassaattut ilanngunneqarnerata kingunerisaanik ornigussimallutik.

Piorsaanissat tamarmik imminnut ataqtigiipput. Nunatsinni pissutsit isiginiarlugit nunaqarfimmiunut atortinneqartut avaqqunneqarsinnaanngillat. Nunaqarfimmiut kiffartuunneqarnerat suli pitsaanerulersinniarlugu nioqqutissanik assartuinikkut tunisassiornikkullu aaqqissuusseqqinnerit ingerlanneqaleruttorput. Pitsanngorsaanerit tamakkua ukioq manna naammassillugit suliarineqassapput.

Aalisarnermik inuussutissarsiuteqarneq nunatta aningaasarsiornerani qiteqqatullusooq inissisimajuarpoq. Ukiuni makkunani aatsaat taamak raajaqartigaaq raajalli akiisa appasippallaarujussuarnerat raajarniutaatilippassuarnik ilungersunartorsiortitsivoq. Aalisarnermi pissutsit taama innerisa nutaamik eqqarsartariaqarnermik piunaffigaatigut.

Ukiuni arlaqalersuni aalisarnermik inatsisip nutarsarnejarnissaa eqqartuiffigereerlugu ukioq manna kiisami inatsisissaq Inatsisartuni saqqummiunneqassaaq. Inatsisissami aalisarnermik inuussutissarsiuteqartut nunarsuarmi aalisakkat akiisa nikerartuarnerinut nalimmassarsinnaanissaannut periarfissaat pitsanngorsaavigissavagut.

Qaleralinniarnermi ukioq mannattaq nutaamik periutsimik aallartitsissaagut, tassa pisassiussuteqartarnerit eqqunneqartussanngormata. Taamaaliornitsigut qaleralinniarnerpup piujuartitsinermik tunngaveqartumik aqunneqarnissaa qulakkeerniarparput.

Saattuaqartuaannarnissaa qulakkeerniarlugu ukioq mannanut pisassiussutissat siornanut sanilliullugu allannguuteqarnissaat naatsorsuutiginnilarput.

Saarulliit takkussinnaanissaannut upalungaarsartariaqarpugut. Aalisarnermut siunnersuisooqatigiit ataanni saarulliit takkutissagaluarpata aqutsinikkut pilersarusiorfigineqarnissaat anguniarlugu sulineq aallartereerpoq.

Nunalerinermik savaateqarnermillu inuussutissarsiuteqarneq ukiuni makkunani ingerlalluarpoq. Savat toqoraneqartartut ukiumut 20.000-t angusarpaat, sulilu amerleriarsinnaanerit periarfissaqarluarluni. Savaateqarnermik inuussutissarsiuteqarneq ineriartorpoq, ullumikkut takornariaqarneq, naatitsinerit nersussuaateqarnerillu savaateqarnermut akuutinneqarlualersimallutik, taamatullu ineriartortitsineq tulluussimaarutissaavoq.

Piniartuunermik inuussutissarsiuteqarnerup suli annertunerujartortumik kiggigunneqaraluttuinnarnera isiginngitsuusaarneqarsinnaanngilaq. Piniagassat inuiaqatigiittut misigisimanitsinnut puilasoaqarfiuppullusooq, atorluarnissaannullu nunarsuarmioqataanerput naapertorlugu pisussaafeqarluta.

Piujartitseqataajumalluta nunarsuarmit akornanni isumaqatigiissusiornerni atsioqataasareerpugut pisussaaffiliisunik. Akisussaaffimmik tigusineq malitseqartarpoq tamannalu piniartut ulluinnarni inuuniapilootariaqarnerinik sunniuteqarpoq – killilersuisariaqarnerimmi avaqqunneqarsinnaajunnaarnikummata.

Aningaasaq naalagaralugu inuulernitsinni piniartuunermik inuussutissarsiuteqarnerup nutaamik nalilersoqqinnissaanik piumaffigisariaqalerpugut.

Ullumikkut piumasaqaatit allanngorluinnarsimapput, tamatumalu saniatigut silaannaq allanngoriartupiluulernikuulluni. Naleqqussartariaqarnek allaqqunneqarsinnaanngilaq. Siulitta naleqqussartuarnermikkut uumasinnaasimanagerat nappatigaarput uagulli kinguaajusugut amerlaneroqaagut inooriaaserpullu allaaneroqaluni.

Kisiannili puigussanngilarput piniartut pissaqartuarnissaat qulakkiissagatsigu, ilaqutariippassuimmi inuuniarnermikkut piniartuuneq tunngavigaat. Inuuniarnerat ataqqineqartariaqarpoq eqqaamajuartariaqarparpullu killilersuiniaannarluni killilersuisoqartarsinnaanngimmat.

Pinngortitap inuuffigisatta unammillerpaatigullusooq – immami siku naatsorsuutissaajunnaariartorluni allanngorpoq, sermersuullu sinaa sumiiffiit ilaanni tiffariartupiloorluni.

Allanngoriartornerit piffissaagallartillugu naleqqussarfigissagutsigit siorngerlugit ilisimasaqarfiginissaat pisariaqarpoq, matumanilu annertunerujartortumik ilisimatusarnermik ingerlatsinissaq pingaaruteqaleraluttuinnarpoq.

Nunarsuup sinnerata silaannaanut nunatsinni eqqaanilu pisut aalajangiisuulluinnartuupput, taamaattumillu maani pisut avataaneersunit aamma soqutigineqartorujussuullutik.

Ukioq manna Nunat tamat akornanni Issittup ukiuanik taallugu issittumi ilisimatusarnissarsuit aallartinneqartussaapput. Suliniutit ukiuni aggersuni ingerlaavartussaapput, tamanna atorluarniarsinnaavarput. Pinngortitaleriffik matumani assersuutissaqqissuuvoq.

Ukiuni atuuffigisamini avataaniit aningaasalersomeqartunik ilisimatusarnermik aammalu sulisitsinernik qammaalluarsimavoq, taamaalilluni aningaasaliissutaasartut maannamut katillugit 200 million koruunit pallillugit amerlassuseqarlutik. Aningaasat avataaniit pissarsiarineqartartut maani nunatsinni suliffeqarfinnik aningaasanillu kaaviiartitsinermik pilersitsiinnaratik aamma ilisimasanik annertusaanermik akeqanngitsumillusooq pissarsiffiisarput. Ilisimasat silaannaap allanngoriartorneranut ingerlaavartumik naleqqussarnermut atorneqarsinnaasut.

Ukioq pisoqarfioqisoq qaangiuppoq, sulili ukiut pissanganarnerusut ornippagut. Suliassanik ulikkaarpugut, tamattalu pisariaqartinneqarpugut. Meerannguaniiit nuannaarnermik aallerta, inuusuttuniit sapiissusermik aallerta utoqqartatsinniillu eqqissinermik ilisimassusermillu aallerta – tamattalu nukissamik tunioraqatigiitta.

Nunatsinni utoqqartavut suli peqqillutik utoqqalisartut nuannaarutissaasumik tamatsinnullu pisuunnguutaasumik amerliartorput. Utoqqartavut inuunerup ilinniarfianiit pissarsingaarsimareerlutik tunniussassaqaangaarlutillu akornatsinni ipput ilaqutariippassuarni inuiaqatigiinnilumi naleqqatullusooq inissisimallutik. Inuunermi naleraqanngikkutta sammivissaalatsilissaagut, utoqqartattalu naleraq malitarpur siuliminnit inuunerup ingerlateqqinneragut aqquasaarsimasaat uaguttaaq kinguaajusugut ingerlateqqissavarput.

Meerannguit, inuusuttunnguit tamattalumi utoqqartatsinnit ilisimassusermik, toqqissinermik, toqqissinermillu aallerfissaqarpugut.

Eqqaamatigu tamatta inuttut ataasiakkaatut tunniussassaqaqaratta tamatsinnut pisuunnguutaasussanik. Pisariaqartinneqartutut misigisimaneruna nukissamik tunisisartooq inuunermillu isumaqalersitsisartooq.

Inuiaqatigiinni suleqataasut tamaasa qamannga pisumik qutsavigaakka.

Qanortoq ukiortaap tamatsinnut pilluarfiullunilu angusaqarfiulluarili. Ataqpeqatigiilluta ingerlaqatigiitta.

Ukiortaami pilluaritsi.

Guutip nunarput sernigiliuk